



Minggu, 25 Februari 2024
Ogen: Perb. Rasul 9:37



"Sakit Seh Mate"



Adi kita nggeluh tentu kondisi kesehatenna labo lalap sehat, sekali-sekali sakit ka nge kita. Ertina memang bas kegeluhenta maka sehat ras sakit eme ayam-ayam kegeluhen. Hal enda labo tersilahi kita.

Tabita si jadi tokoh i bas paksa tenengta bulan enda pe iperhadapkan ku bas kondisi sakit; janah arah pinakitna ndai mabai Tabita mate. Payo nge e sakit seh matena tabita erkiteken la ia beluh njaga diri bage pe kesehatenna? Tentu lang. Tapi tujunna arah situasi sakit seh matena Tabita gelah teridah kuasa dengen kemulian Tuhan. Kematén Tabita erkiteken pinakitna erbahansa ceda pusuh enterem jelma si kidekah geluhna i sampati Tabita.

Sakit seh mate labo hal si mesunah guna i pahami ras ialoken; pengalamen penulis, hampir lebih kurang sada tahun ngarak-ngarak nande kekelengen lako erjuang ngelawan pinakit CA Rahim; i sinar 36 kali ras ndalani kemo dalam 6 kali. Pengidah penulis kin pe nggo nge erpala-pala nande guna ndalani kerina proses gelah sehat rikut pe ras semangat si tetap i bereken; kepeken proses si ilewati si kin arus ndalani kemo sekali nari lanai terdalanken, nande kekelengen arah pinakitna ndai berkat ndahi Tuhan. Berkatna nande ndahi Tuhan erbahansa ceda pusuh keluarga; bali bagi penggejapen kalak si ngaloken penampat arah Tabita. Pengalamen enda mpeturah perukuren kepeken manusia ersura-sura nge ngenca tapi si erbahan keputusenna eme kap Dibata; sakit seh mate labo kesialen tapi arah kematén nande, penulis enggejapken maka Dibata erkuasa nandangi kegeluhen anak-anakna.

➤ Kuasa Tuhan teridah arah situasi (sakit seh mate) geluhita